

24. januar 2015

FM2015/017

Inatsisartut suleriaasianni § 37 naapertorlugu matumuuna Naalakkersuisunut imaattumik apeqquteqaateqarpunga:

Apeqqut:

Kigutigissaaneq pillugu Namminersornerullutik Oqartussat nalunaarutaat nr. 15, 13. september 2006-imeersumi § 7, imm. 2-mi issuaaneq ataani pisoq naapertorlugu apeqquteqarpunga:

- 1. Nunatsinni illoqarfimmiit illoqarfimmut kigutigissaanikkut sullissinerit qanoq assigiingitsigisumik ingerlanneqarnerat Peqqinnissaqarfimmiit nakutigeqqissaarneqar-pa?**
- 2. § 7-imi inuit allat taaneqartut kikkuugamik?**
- 3. Kigutaasat imaaliallaannaq peerneqarsinnanngitsut nalinnaasumik neqeroorummut ilaatinneqanngillat, peqqissaaveqarfiulli nukissai tamatumunnga naammappata neqerooritigineqarsinnaallutik. Kigutigissaavinni qaqugukkut nukissat naammalersaramik, imaluunniit qanoq isiornikkut naamalersinnaagamik?**
- 4. Kikkut periarfissamik tamatumunnga atuisinnaappat aamma akiliuteqartarpat?**
- 5. Innuttaasut periarfissaq taamak tunngavilersugaq qaqugu atulersinnaassavaat?**

(Inatsisartuni ilaasortaq Vivian Motzfeldt, Siumut)

Tunngavilersuut:

Qulaani apeqqutigisannut atasumik nalunaarummi ima allaqqasoqarpoq:

“§ 1. Imm 2. Sulinerup piareersarnerani sumiluunniit najugaqaraluaaraanni kingutigissaanikkut assigiimmik sullinneqarsinnaaneq anguniarneqassaaq”.

“7. Inuit allat najukkami tamatumunnga nukissaqartitsisoqassappat akeqanngitsumik kingutileri-tinnissamut neqeroorfigineqarsinnaapput”.

“Imm 2. Neqeroorummut ilaapput pilertortumik katsorsaaneq, aalajangersimasumik akuttus-susilimmik misissuinerit, aamma ataasiakkaat pisariaqartitsinerat naapertorlugu pitsaaliuinerit,

inunnut ataasiakkaanut siusinnerusukkut kingutigissaasarnermut naapertuuttumik kingutit nakorsaata naliliinera naapertorlugu asiunaveersaataasumik kingutileritinne, kiisalu kingutaasaliineq. Nalinginnaasumik neqeroorummut ilaatinneqanngillat kigutaasanik imaaliiallaannaq peerneqarsinnaanngitsunik ikkussilluni suliarinninnerit assigiinngitsut, peqqissaaveqarfiulli nukissai tamatumunnga naammappata neqeroorutigineqarsinnaallutik.”

Nunatsinni kigutileritittarneq sumi najugaqarneq aallaavigalugu periarfissatut neqeroorutigineqartut assigiinngitsorujussuupput. Aamma kingutigissaaneq pillugu nalunaarut nr. 15, 13. September 2006-imeersoq oqariartuutigineqartutigut ataqatigiinngilluinnarpoq, paasiuminaatsorujussuullunilu, minnerunngitsumik kalaallisuaa paasiuminaatsorujussuulluni.

Illoqarfinni anginerusuni kigutileritinnissamut periarfissat atuupput naak ilaatigut piffissap ilaannaa periarfissiisoqartaraluartoq. Pitsaasunik kinguteqarneq peqqinnermut attuumassuteqarluinnarpoq, kiisalu peeqqissumik qaneqarneq alleroqarnerlu pingaaruteqarluinnartuullutik. Kigutileritittarnermut nalunaarummi takuneqarsinnaavoq nalinginnaasumik suliaritinnermit annertunerusumik suliarineqarsinnaaneq periarfissaanngitsoq, imaluunniit nalunaarummi allasimasut naapertorlugit: Peqqinnissaqarfiup nukissai akissaatillu naammangippata, neqerooruteqartoqarsinnaanngilaq. Tamatumalu malitsigaa kigut immikkut suliarineqartariaqalersimappat neqeroorut tunniunneqarsinnaasoq tassatuaasoq kigutaarsineq, naak kigutip tamuffasitut pigiinnarnissaa sumiiffinni immikkut akiliuteqarluni namminersortumut suliaritinnissaa periarfissaappat attatiinnarneqarsinnaasartuq. Inuppassuit sineriammi allamik periarfissaqannginnertik aallaavigalugu kigutaarukkiartinnartarput.

Kigutit inuup naleqassusaannut annertoorujussuarmik sunniuteqarput, taamaappoq aamma inuk timimigut peeqqissuussaguni nerisamimut iluamik tamuffaseqartuartariaqarpoq. Taamaamat immikkut annertunerusumik kingutileritinnissanaaneq, kingutigissaavinni tamani ataavartumik neqeroorutaasinnaasariaqarpoq, akiliisitsisarnerilluunniit periarfissiissutigalugit. Kigut suliaasaq nalinginnaasumik suliarineqartartut sinnerlugit suliarineqassappat inuk kinaluunniit periarfissaqartariaqarmat immikkut akiliuteqarnermigut kigutiminik attasiinnarsinnaanissaminut.